

Date -02/10/2023

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Chakma Autonomous District Council (CADC)-ah sorkar thar din tumin hmalakna kalpui mek a ni.**
- 2. Myanmar raltlante biometric leh biographic data lakkhawm zawh fel hun tura bituk chu thla 6 atan Ministry of Home Affairs in a pawtsei.**
- 3. Churachandpur leh Aizawl Mualpui helipad inkara helicopter service chu chawlhkar khatah vawi khat a thlawk thin dawn.**
- 4. China khawpui Hangzhou-a Asian Games neih mekah India infiammi-te'n medal 53 an la tawh.**

<><><>

CADC

Thla 4-a upa Chakma Autonomous District Council (CADC) MNF sorkar chu a nghing chho mek a; sorkar thar ZPM kaihhruai a pian theih na'n hmalakna kalpui mek a ni.

Lawngtlaia kan Corr. Lalnggheta Ralte-in thu a dawn dan chuan, CADC-a MNF Legislature Party Leader, Chief Executive Member (CEM), Rasik Mohan Chakma leh a thawhpui MDC 17 te chuan ZPM zawm tumin thil an kalpui mek a, tunkar hian ZPM Gen. Hqrs hruaitute Chawngteah kalin CADC-ah ZPM sorkar a pian theih nan a hmawr bawk fel an tum a. ZPM Working President Pu K. Sapdanga'n Nilaini khian an party-ah a lawmlut dawn nia thu dawn a ni.

Kumin May thlaa CADC inthlanpuiah khan Seat 20 awmna CADC-ah hian MNF chuan bial 10 lain BJP leh INC ten Seat 5 ve ve an chang a. BJP leh INC atanga MNF thlawptute nen CADC-ah hian Rashik Mohan Chakma kaihhruai MNF sorkar din a ni a; kumin May ni 25 khan Rashik Mohan Chakma hi CEM atan lakluh a ni.

Thu dawnna pakhatin a sawi dan chuan Assembly inthlanpui lo awm turah Tuichawng biala MNF-in an dintir loh avangin Rasik Mohan Chakma hi a lungawi lova, a hote nen ZPM zawm an titlu ta a ni. Tuichawng bialah hian MNF chuan Durjya Dhan Chakma chu an party candidate turin an ruat fel tawh a ni.

<><><>

MYANMAR REFUGEES

Mizoram sorkarin Myanmar raltlante biometric leh biographic data lakkhawm rih loh ni se tia thutlukna a siam tukah Ministry of Home Affairs (MHA) chuan he thil kalpui zawhfel hun tur bituk chu thla 6 atan a pawtsei.

MHA hian Mizoram leh Manipur-a Myanmar raltlante biometric leh biography data lak khawm hna, kumin September thla chhunga zawh fel tura a lo tih tawh chu nakum March thla thleng atan a pawtsei a; hei hi Manipur tualchhung buaina vang leh Mizorama assembly inthlanpui a awm dawn vang nia hriat a ni.

MHA-in biometric leh biographic data la khawm tura a tih hi thawk turin Mizoram sorkar hnathawkte an inpeih fel tawh naa Nilaini liam taa Council of Minister thu khawm chuan kalpui rih loh ni se tiin thutlukna a siam a. Council of Minister inkhawm zawh hnua chanchinbumite'n an kawmna-ah Information and Public Relations Minister Pu Lalruatkima chuan Mizorama Myanmar raltlan Sing 3 chuang awm mekte mit naute thlalak, an kutzia lak leh an chanchin kimchang la khawm tura sorkar laipuiin a rawn ti chu Council of Ministers thukhawm chuan tun dinhmunah kalpui rih loh ni se an tih thu a sawi a. Tunah hian inthlanpui lo awm tur avangin sorkar hnathawkte an buai em em a, inthlan puan a nih hnu pheih chuan khaw dang hawi hman lova hna an thawh a ngaih dawn avangin he hna thawk tura Ministry of Home Affairs-in a rawn ti hi kalpui rih loh ni se, an ti a ni, a ti.

Hei bakah hian Myanmar atanga rawn raltlante chu Mizorama mite thisen zawmpui leh unaute an nih avangin an biometric leh biographic data lo lak chu inthliarhranna anga a lan theih avangin tun dinhmunah chuan kalpui a tul rih lo an ti a. Pu Lalruatkima chuan Myanmar raltlante tan hian sorkar laipuiiah anmahni enkawlina tur vawi tam tak dil a ni chungin a harsa hle a; chuti chung chung chuan unau na na na chu theih ang anga lo tuam hlawmin naupang sikul kalrual a sang tel chuan Mizoramah lehkha zir chhunzawmin zirlaibu a thlawna pek bakah chawchhun pawh Mizoram chhunga zirlaite ang bawkin a thlawnin an dawng ve a ni, a ti.

<><><>

COPTER SERVICE

Churachandpur leh Aizawl Mualpui helipad inkara helicopter service chu chawlhkar khatah vawi khat a thlawk thin dawn.

Mizoram sorkara Civil Aviation wing Principal Consultant Wing Commander Joe Lalhmingliana hnen atanga Akashvani Aizawl thudawn danin helicopter hi Nilaini apiangin Churachandpur leh Aizawl Mualpui helipad inkarah a thlawk thin dawn a. Zing lam dar 11 leh minute 45-ah Churachandpur atanga thlawk chhuakin chawhnu dar 12 leh minute 25-ah Mualpui-ah a rawn tum thin dawn a. Mualpui atang hian dar 12 leh minute 35-ah thlawk chhuak lehin Lengpui tumhmun a pan ang a, dar 12 leh minute 55-ah Lengpui atanga thlawk chhuakin chawhnu dar 1 leh minute 35-ah Churachandpur-ah a tum leh thin ang. Churachandpur leh Mualpui inkar thlawh man/chuan man hi cheng 4,500 a ni a. Mualpui-Lengpui-Churachandpur chuan man hi cheng sang ruk a ni thung ang. Helicopter ticket hi Thawhlehi apiangin a lak theih dawn a ni.

A tirah chuan Manipur sorkar hian chawlhkar khata vawi 2 thlawk turin ruahmanna a siam a. Mizoram sorkar chuan chawlhkar khatah vawi 5 tal thlawk se tiin rawtna a siam a, Manipur sorkar lam chhanna a la hmu lo. Kar khata ni 1 thlawhtir phawt a nih tur thu pawh hi Manipur Transport department lamin tawngka a an rawn hriattir a ni a. Nilaini (September ni 27)-a a thlawh tan ni khan Churachandpur atangin mi 10 Aizawl an lo thleng a. Aizawl atangin Churachandpur-ah mi 5 an chho thung. Hemi ni hian pilot hian helicopter ticket, boarding pass leh passenger manifest a rawn keng chauh ni a thudawn a ni a. Aizawl atanga thlawk chhote hi Civil Aviation-in ticket an siamchawp hmanga kal an ni.

<><><>

JJM Mamit

Thingtlang khua ten tui thianghlim in tur hnianghnar tak an neih theihna tura central sorkar hmalakna - Jal Jeevan Mission (JJM) hnuaiah Mamit district chhung khaw hrang hrangah hma lak mek a ni.

PHE WATSAN Division EE Pi Helen Saibuangi chuan JJM hi Mamit district-ah pawh chak taka kalpui chhoh mek a ni, a ti a. Kum 2019 - 2020 chhungin ruahmanna 28 (khaw 28 ah), kum 2020 - 2021 chhungin ruahmanna 18 (khaw 18 ah), kum 2021 - 2023 chhungin ruahmanna 35 (khaw 35) ah te kalpui a nih thu sawiin tun dinhmunah Mamit district chhung khaw 81-ah kalpui a ni a, chu'ng zinga khaw 46-ah hna zawh tawh niin khaw 35 ah thawh mek a ni, a ti.

JJM hi hi October ni 2, 2019 atang khan kalpui tan a ni a, nakum March ni 31, 2024 a zawh hman tur a ruahman a ni.

<><><>

CHAMPHAI

Law & Judicial Minister Pu TJ Lalnuntluanga'n Inrinni khan Champhai District a Tuipui khaw Community Hall cum Boxing hall a hawng.

Hall hawn thar hi SBMRM Fund hmanga sak niin cheng nuaih 40 leh MLA Fund cheng nuai 10 senga sak a ni a, nikum May ni 10 atanga sak tan niin December ni 29 khan sak zawh fel a ni a, a dung ft. 86 niin a vang ft. 36 leh a san zawng ft. 20 a sak a ni a, inthiarna 1 dah a ni baw.

Pu TJ Lalnuntluanga chuan Champhai leh a chhehvel tan Tuipui khua te inpek thinna chu theihngilh chi a nih loh thu a sawi a. Tuipui khaw hmasawna atana Sawrkarin theihtawp a chhuah thu sawiin khawchhung inkalpawhna White Topping te, feh kawng nuam zawk siam te, Boxer te tana Hall tha sak te, tui connection siamsak te, Mobile Network tha leh Champhai leh Tuipui inkalpawhna kawngpui chhe tawh tak siam that hnate an thawh thu a sawi a. Tuipui khaw mite'n tomato an tharchhuah hralh zawh lova tawih awm thinte a awm tawh lohna tura ruahmanna siam a nih thu te tarlangin an thlai thar te man man zawk leh tha zawka an hralhchhuah theih na'n tomato sawngbawlina khawl sawrkar in a buatsaih sak thu a sawi.

Minister chuan Tuipua Health Worker dah tura hmalak ni mahse a thawk tur Health Worker zawn chawp an ngai thin chu a buaithlak thin thu a

sawi a. Tuipui khua ami ngei Health Worker an awm theihna turin zilaite zirna kawngah pawh hmasawn tum turin a chah. Minister chuan Champhai leh Aizawl inkar kawng chhe tak chungchang Sawrkar Laipuih thlenin kawngpui tha an neih theihna tura Chief Minister nen hma an lakna zarah kawngpui lian leh tha a awm thu a sawi a, Kawngpui thar Tuipui atanga kal pawh theihna tura hmalakna tur Tuipui khawtlang hruaitute nen an lo sawiho tawh kawng laihna tur sum pawh dahfel tawh niin laih mai theih a nih tawh thu a sawi bawk.

Tuipui VCP Pu Rosangkima chuan Tuipui khua te harsatna leh mamawhna te hriaa Minister-in kawng hrang hranga hma a laksakna ah lawmthu a sawi.



SWATCHTA HI SEVA

Ram chhung hmun dangte'n nimina ram pum huap faina beihpui thlakna ni an huaihawt laiin Pathianni a nih avangin Mizoram sorkar chuan a hmang ve lo.

Hemi chungchang Chief Minister Pu Zoramthanga'n a Instagram-a a tarlan dan chuan, India Hnampa Mahatma Gandhi piancham October ni 2 puala Faina Ni hman thin chu ram pumah hlawhtling taka hman a nih theih na'n sorkar laipui chuan Faina Ni beihpui thlak chu September ni 15 atanga October ni 2 thleng neih turin ruahmanna a siam a. Amaherawhchu October ni 1 hi Pathianni a nih avangin Kohhran mite tan he ni-ah hian faina beihpui thlak a remchang ve lova. Chuvangin Kohhran member-te tel vek theih nan, a tuk October ni 2 atangin Faina beihpui thlak hi kalpui tura ruahmanna siam a ni a. Hei hi Faina Hapta inanna a ni nghal bawk dawn a ni, a ti. Pathianni ni lova vawiin, October ni 2, Mahatma Gandhi pianchama he hun hman a nih tur thu hi UD & PA department pawhin an chhuah a ni.

Hetihlai hian Gandhi Jayanti puala ram pum huapa Faina Hnatlang zawmin Larsap Dr. Hari Babu Kambhampati-a leh Raj Bhavan-a thawk officer leh thawktu dangte chu nimin chawhma khan an hnatlang a. Swachhata Pakhwada - Swachhata Hi Seva (SHS) 2023 hnuiaia hnatlangah hian Raj Bhavan leh Old MLA Hostel inkara kawngpui an phiat fai a ni.

Sorkar laipui hnuiaia institution leh pisa thenkhat bakah sipai lamte chuan he ni hi an hmang nia thu dawn a ni a. National Institute of Technology (NIT) zirtirtu leh zirlaite chu Durtlang vengah khawlai tihfai hna thawkin an hnatlang a. Chief Secretary Dr. Renu Sharma-i hovin Assam Rifles lammual-ah leh Dawrpui-ah Assam Rifles leh midangte'n he ni hi an hmang bawk a. Khawlai tihfai hnatlangah hian Aizawl district Bawrhsap Pi Nazuk Kumar-i pawh a tel a ni.



ASIAN GAMES

China khawpui Hangzhou-a Asian Games neih mek ni riatnaah India infiammi-te an che tha hle a, tun thlengin medal 53 an la tawh. Heng Medal an lakte hi Gold 13, Silver 21 leh Bronze 19 te an ni.

Asian Games neih ni riatna bikah hian India tan medal a sur a ni ber a, medal 15 an lak belh a, an medal lakte hi gold 3, silver 7 leh bronze 5 te an ni.

Athletics-ah Gold pahnih lain, inelna pakhatah Games Record an siam bawk. India chuan shooting inelna chu duhthusam a thain a khar a, inelna an hmachhawn tawha an chet that ber tum tawngin medal 22, gold 7 telin an la a ni.

Hemi ni a hlawhtlinna lian ber chu Athletics-ah niin, Avinash Mukund Sable chuan Steeplechase-ah Asian Games record a siam a, meter 3000 intlansiak chu minute 8 leh second 19.5 chhunga tlan thlengin India tan Gold medal a hlawh chhuak a ni.

<><><>